

潛研堂金石文跋尾

潛研堂金石文跋尾續卷第一圓

嘉定錢大昕

漢

中嶽太室闕銘

元初五年四月

右中嶽太室闕銘顧氏金石文字記始著於錄然所見止十三行其釋文誤以崇作嵩祀作起近畢氏翁氏所釋較爲詳審予諦視第十三行丞下似是江字夏下似是西陵字第十五行河東臨下似是汾字而第二行翁釋冢土岱氣四字未敢信其必狀也少室闕題名有將作掾嚴壽此有鄉三老嚴壽蓋卽一人山鄉三老辟掾也

博陵太守孔彪碑并碑陰

建寧四年七月

右博陵太守孔彪碑并碑陰文字曼患以洪氏隸釋讀之羣得十之一二耳元上白博陵太守遷下邳相河東太守以病去位

建寧四年七月卒碑爲博陵故吏崔烈等所立故額題故博陵太守孔府君碑文亦但述博陵治迹而已下邳河東故吏當別有碑今失其傳矣博陵郡不見於郡國志按桓帝紀延熹元年六月丙戌分中山置博陵郡以奉孝崇皇國陵司馬彪志郡國以孝順爲斷則延熹分置之郡例不當書而劉昭注意不一及難免漏畧之譏豈今所傳劉注亦有脫簡邪郡所領縣以碑陰證之則博陵也安平也安國也高陽也南溪澤也此五縣之中唯安國舊屬中山若安平南溪澤本屬安平國高陽本屬河間國則紀云分中山置者亦未核矣故吏題名十三人皆郡縣名字兼舉齊智題博陵博陵者上爲郡下爲縣諸史列傳中此類甚多洪氏隸釋本重出博陵俗刻本少兩字蓋校書者誤以爲重複而去之耳

熹平殘碑

右熹平殘碑乾隆癸丑十月黃郡丞小松訪得之曲阜東關外會學使阮詹事芸臺按試至縣因命移置孔廟并題識左方碑存字厘七十餘有云年廿有七熹平二年十一月乙未者蓋其卒之年月也又云府君君國濟民以禮聞風旌善表德當是曾任郡守者漢時唯郡國守相及都尉得稱府君也攷漢自陽嘉以後用左雄議孝廉年不滿四十不得察舉此君官至二千石計其入官踐歷當亦有年而卒之時僅廿有七豈陽嘉詔書所謂有如顏回子奇不拘年齒者邪

武都太守耿勲碑

熹平三年四月

右武都太守耿勲碑中有十數字經後人重開不無譌舛翁闕學金石記中辨之審矣唯符莢乃胙一句洪氏隸釋闕乃字而

英字未誤翁謂洪誤釋爲英此刊本之譌予家藏鈔本猶未作英也英與美同卽策字漢時郡守賜虎符及策書故有符英之語翁釋爲筭恐未然耿君以嘉平二年三月到官其歲歲在癸丑淫雨害稼而後漢書靈帝紀續漢書五行志俱不言郡國淫雨事知史之失載者多也

晉

任城太守夫人孫氏碑

右任城太守夫人孫氏碑在新泰縣新甫山下向來未有著錄者乾隆甲寅秋阮詹亭洪臺揭以見詒文多剝落而點畫嚴整頗似范式碑筆意任城太守不見其姓名世系據文有夫人在羊氏語知其姓羊也又有庚寅十二月甲申字以干支求之當是泰始六年也又云昔臧武仲先犯齊壯不令予邑蓋用左氏

傳齊侯將與臧紇田事壯與莊古書往往通用其云長沙人桓伯序者桓階也魏志階字伯緒此碑作序古人名字多相應當以序爲正

太公呂望表 太康十年三月

右太公呂望表晉太康中汲令盧无忌所立石已斷裂每行僅存十一二字无忌名與題識年月皆不可得見矣予初意此碑不當在汲縣城疑卽東魏碑裝潢者析而爲二後見范氏天一閣有此碑始知其石尙存溪梅向來持論之失頃黃小松郡丞以搨本見詒讀之又知表後有韻語六行爲魏碑所未錄磻銘之磻作般亦勝於魏碑碑陰題名曼惠已甚尙有功曹主簿等字可辨字畫頗古雅不似東魏之率易然以魏碑校其文存者雖無甚異同而以所闕字數驗之頗有多寡不合且旣錄其文

何又去其韻語或好事者假託爲之未可知也劉青藜亦以此碑爲後人重刻

征東將軍軍司劉韜墓版文

右征東將軍軍司劉韜墓版文乾隆癸卯偃師武進士億於本縣杏園莊得之相傳二十年前邨民掘井所得也其文云晉故使持節都督青徐諸軍事征東將軍軍司關中侯劉府君之墓君諱韜字泰伯叔孝處士君之元子也夫人沛國蔡氏凡四十七字詞甚簡而不題年月其石廣僅二尺餘上銳下平如圭形與漢碑式異予題爲墓版文未知其狀否也軍司之名不見於晉志而紀傳屢見之文帝紀帝奉天子西征是時魏諸王侯悉在新命從事中郎山濤行軍司事鎮於鄴衛瓘傳以本官持節監鍾會鄧艾軍事行鎮西軍司給兵百人李惠傳司馬儵爲寧

北將軍鎮鄴以慈爲軍司羊祜傳爲都督荊州諸軍事嘗欲夜
出軍司徐裔執際當營門曰將軍都督萬里安可輕脫劉琰傳
杜預之伐吳也寔以本官行鎮南軍司王濬傳臣復與軍司張
收等共入觀聽宮王戎傳趙王倫子欲取戎爲軍司王衍傳東
海王越之討荀晞也行以太尉爲太傅軍司義陽王望傳置太
尉軍司一人南陽王楨傳遣軍司謝班伐賈疋熊王承傳王敦
詐稱北伐請承以爲軍司傅祗傳齊萬年舉兵反以祗爲行安
西軍司汝南王亮傳與軍司曹問上言節度之咎由亮而出東
海王越傳以尙書曹馥爲軍司謝元傳時遣軍司鎮慰荒雜劉
允傳爲平南軍司蔡謨傳太尉郗鑒疾篤出謨爲太尉軍司金
石錄晉光祿勳向凱碑嘗爲北中郎軍司是軍司同軍中要職
山濤衛瓘李熹之爲軍司皆在魏朝則魏已有此官竊意軍司

卽軍師晉時避諱改師爲司史臣并魏之軍師亦追改之非魏時本稱也

秦

修鄧太尉祠碑

建元三年六月

右修鄧太尉祠碑首題大秦苻氏建元三年歲在丁卯攷建元之號漢武帝晉康帝劉聰皆嘗稱之此加苻氏於建元之上意欲別於前代而失紀事之體蓋武臣不學者所爲也碑爲馮翊護軍鄭能進修祠而作先云以甘露四年到官又云在職六載末云以其年六月左降爲尚書庫部郎自甘露四年壬戌至建元三年丁卯恰是六載吾友吳山夫換金石存列此碑於曹魏之世蓋未見全文但以甘露紀年意之不知其爲苻秦之甘露非魏甘露也碑書膚施爲夫施北屈爲北掘皆以音同假借而

題名軍主簿數人字皆从草則以去漢未遠罔存古法也鄧太尉卽魏之鄧艾水經注潁陽城南有魏使持節征西將軍太尉方城侯鄧艾廟尙有艾碑秦建元十二年廣武將軍兗州刺史關內侯安定彭超立此別是一碑亦見艾之威德及人久而不忘也艾從艾聲今人讀艾爲兩音實則一辟之轉古人無甚區別如毳錯之錯不妨去入兩讀矣魏志艾始封方城亭侯進封方城鄉侯又進封鄧侯而水經注但稱方城侯豈以封号與姓相涉舉舊封以示別歟抑史有誤文歟

後魏

張相造天尊像記

延昌二年三月

右張相造天尊像記首云道士張相供次云延昌二年歲在癸巳三月乙卯朔廿九日癸未攷通鑑目錄是年卽梁天監十二

年梁魏置閏不同而正月均爲丙戌朔梁置閏於三月後則二月丙辰朔三月乙酉朔而乙卯爲閏三月朔魏置閏於二月後則二月丙辰朔閏二月乙酉朔三月正得乙卯朔溫公目錄本於劉義安長祿自延昌距今千有三百年石刻月日與義安所推不失絜絜足徵劉氏算術之精矣道家祖老莊老聃未嘗棄妻子莊周亦有妻漢武尊方士樂大以公主妻之晉葛洪許邁皆全家學道此相亦道士而有妻有息男有息女是道家雖非正教猶不如釋氏之棄絕人倫也自釋教盛而道教微於是羽流亦以出家爲真修舍華夏之舊規效羅罽之陋俗而道亦非古之道矣

懷令李超墓誌

右懷令李超墓誌文云正光五年八月十八日卒於洛陽縣之

永年里宅越六年正月丙午朔十六日辛酉葬洛陽縣復舟山之東南其云越六年者卽謂正光之六年是年六月改元孝昌當刻石之時猶未改号也證之溫公通鑑目錄其年正月果是丙午朔又唐以前碑誌每云粵以某年月日葬其年号未改者卽承前數之非卒後又隔若干年與此誌同例吾友武盧谷跋是碑謂自正光後又越六年當是武泰二年蓋用尚書越三日越七日之例攷武泰無二年當爲永安盧谷記憶偶誤而永安二年正月乃是癸丑朔非丙午朔故知誌云越六年者承前五年數之耳

中岳嵩陽寺碑

天不二年四月

右中岳嵩陽寺碑碑立於天平二年而文云仰資皇帝聖歷無窮國境寧泰太后德被蒼海永保仁齡攷孝靜帝以清河王世

子嗣大統而清河王未有尊号胡妃亦無太后之稱前朝諸后或已及或別嫁不識此所稱太后何人也其云司空公裴衍昔在齊都欽承師德願歸中國爲寺植主則魏書北史未見其人裴叔業雖自齊歸魏然官未至司空亦不同別名衍也碑書裴爲巡獸汪洋爲汪庠此古字之通用者若東作東樂作樂則違六書之旨矣天平東魏年号潘氏金石文字補遺題爲北齊者誤潘所錄本以補顧氏之闕此碑顧氏已載而復收之亦失於檢點也

造須弥塔記

天平三年正月

右造須弥塔記常熟張子恂遊中州所得其書陛下之降作陸爲它碑所未有最後題名有郭某未知何字殆卽阿个兩字并書之

汝陽王造弥勒像記 天平四年

右汝陽王造弥勒像記在歷城縣龍洞李南潤訪得之拓以遺
予文多殘泐首云大魏天平四年又云朔廿口日使持節又云
侍驛即驛字騎大將軍開府儀又云尙書李涼華又云九州刺
史汝陽王口封似是照字又云敬造弥勒像一軀所謂汝陽王者
未審何人也

邑主造石像碑 武定六年九月

右邑主造石像碑亦張子恂所贈前爲僂語後皆四言有韻之
文云乃作訟日以訟爲頌也戮即夷字露即靈字宐即究字裁
卽哉字佛卽佛字德卽德字真卽冥字等卽筭字孫卽極字義
卽裔字條卽滌字祗卽旄字斐卽妻字悛卽悛字魁卽免字電
卽戀字逸卽逸字徒卽徒字穎卽穎字崙卽岡字

造太上老君石像記

大統十四年四月

右造太上老君石像記其上橫背劉曜光初五年冠軍將軍關
內侯平陽太守豫州刺史太尉公口洪像碑一區凡三十字似
是題額者它碑未有此式也文多曼滅細審之有云故使持節
鎮北大將軍冀州刺史陳留侯蔡伯皆孫等似是蔡氏後裔爲
其祖洪造像以資冥福而作其敘述先世有秦大將軍大丞相
蔡翟故太常卿汝南太守陳留侯蔡順晉征東將軍六州諸軍
事陳留太守兗州刺史司徒公蔡謨字仲口諸人以史證之皆
不合史記秦相有蔡澤翟與澤音相近或可通用然秦時丞相
無大名也漢孝子蔡順史稱孝廉不就不問官太常封侯也
惟司徒公蔡謨與晉史頗合而其字道明非仲口蓋碑出於里
巷不學者之手附會華胄多非其實其書劉聰之聰爲慈麟嘉

之辭爲騁則可以廣晉載記之異聞者也

北齊

董洪造像記 武平元年正月

右董洪造像記首題大齊武平元年歲次庚寅正月乙酉朔
廿六日顧寧人題爲少林寺碑者卽此刻也中州金石記以爲
武平九年者誤武平紀元止於七年不當有九年且亦非庚寅
歲也此碑別體字甚多如齊作衰老作勉率作率徒作徒次作
次彼作彼後作後標作樹置作辦渠作派布作希眇作眇微作
微天作无火作火吉作吉顯作顯曇作曇業作業遐邇作遐尔
藍田作濫田之類又間有篆體如日爲○月爲夕顯合於古其
餘不盡尔也碑後列襄主邑主諸人名黃頭者二曰張黃頭曰
馬黃頭

大般若經殘字及佛名

武平元年

右大般若經殘字及佛名金石家皆未著錄吾友聶劍光游徂來山始訪得之手拓寄予都下且詒以書云光化縣寺東南里許有巨石南面刻大般若經隸書徑五寸剝蝕不能讀後趙冠軍將軍梁父縣令王子椿字蓋卽子椿書也其東面大書四佛名末有中正胡賓及武平元年字魏齊皆承齊制州郡有中正題品人物而縣令帶將軍號六朝徃徃有之

般若波羅蜜經

武平元年

右般若波羅蜜經字徑一尺或七八寸不等蓋因石爲之亦王子椿書也首云文殊師利白佛言世尊何故名般若波羅蜜佛言般若波羅蜜無口無口無名無相以下多闕文亦聶劍光所贈劍光又言泰山有石經略平廣祇許刻金剛經於上字大如

斗不記姓名年代明王世懋疑爲宋元人筆而無所指實今驗其字迹古勁與祖來二刻如出一手當亦出子椿筆宋元人不能如此淳朴也予昔登岱親見彼刻而未及搨因附識之

皇太后造觀世音石像記

武平二年十一月

右皇太后造觀世音石像記黃小松郡丞所寄云得於臨漳縣三臺佛寺其文有云皇太后以武平二年十一月十三日敬造觀世音石像一區以茲勝善仰資武成皇帝昇七寶之宮殿皇帝處萬國之威雄俯兼有心之類一時俱登聖道蓋胡太后所作功德也魏齊造像題刻流傳於今甚多大率邑子維那所爲此像出於宮闈文字完好尤極難得而金石家鮮有著錄者

周

王貧生造像記

保定四年

右王允生造像祀陽湖孫淵如游關中得古佛像有保定四年字知爲宇文周時物攜歸置江寧孫忠愍侯祠允字不見字書瞿鏡濤謂卽允字與允同見廣韻六朝石刻从耳之字或作凡也其稱祖母張香香母陶甌香母樂女香殆當時婦人以香爲美稱猶元時稱女子爲秀矣

造像記

天和二年

右造像記同邑王定山濤游涇陽得周隋造象石刻數種遺弓皆畢尙書關中金石記未采入者此其一也前後皆列邑子姓名又有都維那口長典錄典坐香火之目文云造口像一副卽匾字其文右轉它碑所罕見也

造石像記

天和四年八月

右造石像記亦王定山游涇陽所得畢氏關中金石記未及采

入文云天和四年歲次己丑八月戊午朔一日戊午兩戊字俱少一撇顏魯公千福寺碑八代字亦如此書家省筆非有所回避也次譌作次則齊隋及唐初石刻多同自張參唐元度等正定五經文字以後乃無此失耳文又云仰爲皇帝陛下延祚无窮復顧大冢宰保國安民口延万世所云大冢宰者晉國公護也鄭康成注周禮以胥爲有才智之稱漢人又加言旁虞仲翔解易稱荀爽爲荀諧廣韻諧有才智稱是諧卽胥也漢隸从胥旁者多變从肯此刻有邑謂數人或又作謂皆諧之變體釋氏書以男子未出家者爲優婆塞女子未出家者爲優婆夷此刻云憂婆夷者卽優婆夷也說文憂愁字作𢇛優裕字作𢇛俳優字乃从人旁此書優作憂與說文合彫刻之刻作克則以同音通用也

造像記 保定四年九月

右造像記羅生中溶於吳市買得凡三紙文云維大周保定四年歲次甲申九月丁巳朔八日甲子所列像主邑子複姓昨和者十有七人屈男者十人用井者六人荔非三人同瑋二人孖姐鉗耳薄地各一人用卽罕字或作以廣韻攷之昨和屈男罕井荔非同蹄孖姐皆羌姓廣韻蹄从足旁而此刻與唐安天王碑陰並从王旁譯語無定字也甯甡二族尤多廣韻甡姓不言所自而引姚弋仲將甡耐虎爲證弋仲羌之大族則甡亦羌姓無疑它書或作党則甡之省耳

隋

楊遵義造像記 開皇三年十二月

右楊遵義造像記在涇陽縣遵義父道情母形雙華憺卽喜字

形姓不見於姓氏書當卽邢氏以偏旁相同假借也唐有薛純
隨此遵義之息亦名純施施與施同純施蓋梵語

高平縣石裏村造碣碑

開皇六年二月

右高平縣石裏村造碣碑嘉慶丙辰春錢唐黃小松郡丞揭以
見詒云新出鄒縣石裏村前題云大隨開皇六年歲次丙午二
月壬午八月己丑兗州高平縣石裏村仲思那等卅人造碣之
碑碑中別體字甚多如季作𠂔兗作𠂔裏作𠂔那作𠂔橋作碣
碑作碑浮作浮儵作儵傾作傾克作克苦作苦寧作寧邑作邑
競作競漂作漂淚作淚樓作樓稽作稽婉作婉斷作斷德作德
欄作欄陽朱卽楊朱首尾卽首尾之類皆其異者隋書地理志
但云任城縣舊置高平郡開皇初廢而鄒縣之嘗爲高平縣史
無其文蓋南北朝鄒縣遷改無常史官採訪不能備悉唯石刻

出於當時最可徵信爾

章仇氏造象碑 開皇九年

右章仇氏造象碑黃小松司馬所贈云在汶上縣辛家海三聖堂上截已斷碑陰有開皇九年字知爲隋刻也中央刻佛經語兩旁有象主菩提主菩薩主等姓名多章仇氏隋書盧太翼傳云本姓章仇氏煬帝曰卿四岳之胄與盧同源賜姓盧氏太翼河間人而此刻在汶上則章仇氏所在有之濟寧有唐贈東平大守章仇元素碑述其前世云裂綺去國筮仕于周世官保章因官爲姓秦項之際雍王章邯爲漢所併子孫降處仇山取因生之舊名增卜居之新号是章仇之先爲章氏章又出自紀國春秋紀姜姓而盧爲齊太公之裔亦姜姓故有與盧同源之語矣碑左旁有章仇昨娘名予壻翟生中落謂昨卽五字敬史君

碑尤圓覺施田作拾畝借作拾爲五十昨作同音亦可借用也

造阿弥陀像記

開皇十六年三月

右造阿弥陀像記亦在涇陽縣像卽像字又云口皇

上牛十六

年歲口口口三口寅朔八日辛酉攷通鑑目錄開皇十六年

丙辰正甲寅四癸未則三月當是甲寅朔與石刻合石刻所闕

歲名當爲丙辰矣其云至如水胞俄不消滅胞與泡同

安喜公李使君碑

開皇十七年二月

右安喜公李使君碑前後磨滅文字多不相屬趙氏石墨鐫華
已云名字無可攷今去趙氏又百數十年宜其摧剝益甚矣中
間敘述歷官先云太祖武元皇帝口口在田府望口重乃以爲
外兵參軍事武元皇帝者隋文帝之父忠也李君山楊忠慕僚
累立戰功位至斥章縣開國子其後晉國公宇文護執政又見

信任此以文義推尋得之者也此下文字稍可讀其略云轉大都督進封口州安喜縣開國侯邑一千二百戶又除天官府都上士天和四年除使持節車騎大將軍儀同三司大象二年口司武大夫進位口儀同大將軍皇隋口運口口茅社進爵爲公開皇二年口口閔府車騎將軍六年除使持節邛州諸軍事邛州刺史十一年以疾還京十六年八月口於京第春秋六十有五而前幅又有季父琰之字攷琰之卒於永熙之世其子皆隨孝武入關此君爲琰之從子亦當相從入仕於周與碑所稱大略相應李延壽修史旣列琰之於叙傳而安喜公之名獨不及焉未免失之漏略矣此刻點畫纖細易於摩滅中有數字似經後人鑿改漸失其真今略舉其可信者以資攷史之助

右舍利寶塔下銘其略云皇帝歸依正法

即法

紹隆三寶思与

率土共崇善業敬以舍利布諸州精誠懇切大聖乘

即乘

祐愛

在宮殿典居之所舍利應現前後非一頂戴歡喜敬仰弥深以
仁壽二年歲次壬戌四月戊申朔八日乙卯謹於鄧州大興國
寺奉安舍利崇建神塔以此功德願四方上下虛空法界一切
含識幽顯生靈俱免蓋纏咸登妙果攷隋文帝仁壽元年分布
舍利於三十州各建塔藏之以十月十五日入函子所藏青州
勝福寺銘蓋其一也其二年正月復出舍利分布五十一州建
立靈塔以四月八日入石函鄧州有表言舍利四月六日石函
變作玉及瑪瑙其石有文現正國德三字并有仙人麟鳳等出
此見於王劭舍利感應記者也杭州之神尼塔當亦仁壽二年
所立而其銘不傳矣

潛研堂金石文跋尾續卷第二

嘉定錢大昕

唐

曲阜憲公孔穎達碑

貞觀

右曲阜憲公孔穎達碑新舊書本傳並云字仲達宰相世系表則云字沖遠碑雖曼思而沖遠字特分明表所書三代名諱官階盡與碑合汲古閣本脫穎達一格監本初不誤也穎達長子名志元碑與表同而傳但作志蓋宋人避諱去下一字然傳諱而表不諱它傳於元字亦多不避當時史官非一手無素定之例故也

金紫光祿大夫張嗣碑

右金紫光祿大夫張嗣碑嗣以儒學顯隋唐間太宗徵時嘗從受左氏傳其卒也陪葬昭陵贈官予諡可謂極儒臣之殊遇矣

新舊史俱稱張後嗣碑惟云張嗣殆字後嗣而以字行乎碑云
行鄧王府文學而史不書蓋史家之漏舊史云贈禮部侍郎新
史作禮部尙書碑額亦云故禮部尙書與新史合

洛州思順坊老幼造弥勒像龕記

貞觀二十二年四月

右洛州思順坊老幼造弥勒像龕記字畫秀整有虞歐法度而
不署姓名唯彼徒兩字俱從人旁爲異爾題名稱清信女者數
人皆姓而不名蓋女而未嫁者

洛陽鄉望父老等造像記

永徽元年

右洛陽鄉望父老等造像記後題淳于敬一制文制卽製字王
居士塔銘稱上官靈芝製文與此同文云思念大聖無猶得觀
借猶爲由也云謹於此堪敬造尊儀說文堪地突也金石錄載
後魏天柱山東堪石室銘正用此義讀此刻知唐人猶識古訓

今佛堪字多借用龜字而堪之本義遂晦矣演卽演字新卽新字植卽植字靈卽靈字碑前列諸人姓名有云張荀子賈奴奴者蓋邨野小名尙沿南北朝之舊

李万通造弥勒像記

儀鳳三年六月

右李万通造弥勒像記虞山張子惲游中州歸得以貽予其文云大唐儀鳳三年歲在咸賓六月乙卯朔十七日辛未弟子李万通及妻徐合家等敬造弥勒像一軀上爲天皇天君又爲亡父見存母賈及七祖先靈存亡眷屬法界蒼生俱登正覺其書戊作成后作右蓋它碑所未有

孝敬皇帝睿德紀

上元二年八月

右孝敬皇帝睿德紀高宗御製并書書法與晉祠銘相似孝敬皇帝者高宗之第五子皇太子宏也上元二年從幸合璧官尋

堯新唐書以爲武后酖之是年追加謚號葬於緱氏縣景山之
恭陵宋熙寧八年省緱氏縣入偃師今爲偃師縣地矣孝敬字
宣慈新舊史皆失載

敬善寺石像銘

右敬善寺石像銘宣德郎守記室叅軍事李孝倫撰石像爲紀
國太妃韋氏所造則孝倫殆紀王府之記室叅軍矣此刻不署
年月而書法頗似虞永興當是高宗朝所刻

邛州刺史狄知孫碑

右邛州刺史狄知孫碑其家世歷官可辨識者曰曾祖叔湛魏
平西將軍口邑子曰父孝緒唐行軍總管大將軍金紫光祿大
夫尚書左丞使持節汴州諸軍事曰公卽臨穎公之第五子也
曰起家國子明經擢第補東宮內直曰鄭州司兵參軍兼鄭王

府兵曹參軍曰梁州都督府錄事參軍俄除越州剡縣曰華州
鄭縣令曰夔州都督府長史曰贈使持節邛州諸軍事邛州刺
史曰嫡子故中書令尚書右僕射贈司空梁國文惠公蓋仁傑
之父也碑下截剝落不見建立年月趙氏金石錄以爲載初元
年正月未審然否趙錄題稱周邛州刺史狄知惡碑今案此碑
額及題皆冠以大唐字不當作周或校書者妄以意改爾

馮善席浮圖銘

萬歲通天二年四月

右馮善席浮圖銘文稱大周萬歲通而二季歲次景申肆⑤景
寅朔拾肆⑥己卯景寅者丙寅也月日用大壹貳字它碑所罕
有碑書夫人沈氏卽沈字今俗浮沈字多作沉欲與沈姓之沈
示區別蓋失之矣文云陰魄陽魂如風似燭按古詩百年未幾
時儼若風吹燭陸倕思田賦威風燭與石火嗟民生其若寄煥

信傷心賦一朝風燭萬古埃塵唐汝南周君墓志亦云風前失燭知此語相傳久矣

河東州刺史王仁求碑

聖歷元年正月

右河東州刺史王仁求碑同年王述庵侍郎任雲南方伯時所贈向來收藏金石家皆未著錄其額云大周故河東州刺史之碑而題稱唐朝故使持節河東州諸軍事河東州刺史上護軍王府君碑銘者仁求卒於高宗朝其長子善寶襲職至武后聖歷元年始爲樹碑相距已二十五年仁求固唐臣非周臣也攷河東州本唐羈縻州隸黎州都督府史但言開元前置據此碑知高宗朝已有是州矣仁求卒於咸亨五年八月十五日足月改元上元未改号以前仍稱咸亨碑刻紀年之例如此明史稿昆陽州唐置河東等州沒於南詔元置昆陽州其所領三泊縣

北有河東故城今三泊縣亦省入州矣善寶出於鑿夷而書法淳古可愛當是華人游其幕者代爲之耳

鬱林觀東巖壁記

開元七年正月

右鬱林觀東巖壁記海州司馬崔惟忬與東海縣令元暖丞閻朝賓主簿孫克友尉苟抱簡上官崇素司兵寶晏游賞斯巖而惟忬子逸爲文紀之八分書鑿諸巖開甚雄偉不著書者姓名疑卽出逸手也碑惟見於趙錄近代金石家皆未寓目山陽吳山夫爲予言碑見在海州後廿年嘉善孫山尊令贛榆爲予搨致之其文云晚齡心事盡於巖閒齡卽齡字之省

銀青光祿大夫口憲基誌

開元十四年十一月

右銀青光祿大夫口憲基誌石已損裂一角不得其姓首云公諱憲字令將平陽臨汾人其叙先世有云漢大將軍棘蒲侯武

故偃師金石遺文記題爲陳憲按棘蒲剛侯陳武見於漢書功臣侯表而文帝紀以棘蒲侯柴武爲大將軍與表不同臣瓚以爲有二姓則武實以柴姓顯廣韻陳氏出潁川汝南下邳廣陵東海河南六望不聞有出不陽者此君宜是柴姓矣古書宅與擇通此碑宅乎中庸正用禮記擇乎中庸也撰書姓名俱損失不傳而分隸秀勁有梁昇卿史惟則法度

麓山寺碑

開元十八年九月

右麓山寺碑在長沙府城外嶽麓山乃李北海書之極有名者文云元徵中尙書令湘州刺史王公僧虔右軍之孫也以晉宋齊史攷之僧虔爲丞相導之元孫於義之爲族曾孫不當云孫也又云梁天監二年刺史夏侯公譚祥按梁書南史俱作詳古書祥詳二文恒通用

眞容靈應頌

天寶元年七月

右眞容靈應頌碑末題開府儀同三司尚書右僕射曾孫戴仍
書攷唐戴胄與至德兩世宰相至德官至尚書右僕射其卒也
贈開府儀同三司則必至德之曾孫而唐書世系表不見其
名蓋史家失於採訪矣選舉志三品以上蔭曾孫五品以上蔭
孫孫降子一等曾孫降孫一等贈官降正官一等僕射秩從二
品開府儀同三司秩從一品僕蓋承蔭而未得官者故以曾孫
繫銜猶梁府君碑稱四品孫五品孫也又云禎祥蓀臻妖溺不
作溺卽沴字隸楷偏旁从沝者或變从余遂與尔相涉又變尔
爲爾也說文溺滿也从水爾聲沴水不利也从水沝聲兩字聲
義俱別似無可通之理字書亦無讀溺爲沴者然漢書五行志
惟金沴本說曰沴猶臨莅不和意也如淳注讀沴爲拂戾之戾

卽說文亦有水不利之訓以義求音許如當無異讀則與溺音仍不相遠或古篆泝戾字本从尔得聲尔爾元可通用未可遽以此碑溺字爲流俗妄作也

明皇御書勅

右明皇御書勅一道刻於裴光庭碑之陰其文云贈太師光庭嘗爲重任能徇忠節忽隨化往空存遺事其子屢陳誠到請朕作碑機務之繁是則未暇朝廷詞伯故以口卿彼之行能卿之述作宛其鴻裁因茲不朽耳凡十一行行書甚壯偉而不署年月顧氏金石文字記題爲賜張說勅說卒於開元十八年光庭之卒乃在其後則奉勅撰碑者蓋別一人非張說矣或云當是張九齡今姑闕之

張惟一祈雨記

乾元二年二月

右張惟一祈雨記刻於述聖頌之左側据宰相世系表惟一嘗
出清河東武城宰相錫之孫官至華州刺史此記正在刺華時
與唐表合新舊史皆不爲惟一立傳王定保摭言載蕭茂挺父
爲莒丞得罪清河張惟一時佐廉使按成之茂挺初登科自洛
還莒道邀車發辭哀乞惟一涕下卽日舍之且曰蕭贊府生一
賢方資天下風教吾由是得罪無憾也宋子京嘗采其事入穎
士傳蓋其好賢之誠有足多者又嘗爲荊州長史見呂誼傳

石門山唐人詩

右石門山唐人詩其一題云游石門山勅採訪大使潤州刺史
徐嶠作一題云題石門山曝布入韻敬贈吳郡守兼江東採訪
使張愿作皆刻于青田縣石門洞石壁乃數百年後爲宋人大
書題名於上鑿損殆盡徐詩首二行尙可辨張竟無一字存者

可歎也瀑布之瀑今人多从水旁此刻獨日旁攷說文瀑疾雨也一日沫也一日瀑實也詩曰終風且暴是瀑有三義山泉自上出曰瀑布不見於尔雅或取其疾如瀑雨其白如布則从水或取其下垂如瀑布之懸則从日於義得兩通也

上據題名

右丘據題名凡六行其文云陳鄭澤潞等州節度行軍司馬殿中侍御史丘據再隋使主赴上都朝謁往來皆虔拜神祠時寶應二年六月八日記按寶應無二年据代宗紀廣德元年七月壬子大赦改元則六月以前猶稱寶應二年矣其云使主者節度使李抱玉也抱玉本陳鄭穎亳節度使代宗卽位兼澤潞節度使方鎮表寶應元年澤潞節度增領鄭州又增領陳邢洺趙四州正抱玉爲帥之日德宗以後陳鄭與澤潞各自爲鎮不復

相統攝矣。藝文志有上據相國涼公錄一卷紀李抱玉事。此使主爲抱玉之證。或以郭子儀當之。非是。

麻姑仙壇記 大歷六年四月

右麻姑仙壇記小字本黃魯直謂是慶歷間學佛者所書。趙德甫亦疑其僞。宋人書多放縱不守唐法。尤不喜作小楷。故有意抑之。未可爲定論也。碑題撫州南城縣攷南城漢舊縣本屬豫章郡。晉宋以後改隸臨川郡。唐改臨川爲撫州。縣仍隸焉。宋始於南城置建昌軍。自是乃別於撫州耳。

黃石公祠記

大歷八年七月

右黃石公祠記祠在東阿縣史記所謂濟北穀城山也。唐天寶中郡守裴序禱雨有應。布衣李卓爲文記之。卓卽栖筠之初名也。記成未刻。至大歷八年馬炫爲郡守始勒諸石。工未畢而謝。

病去後守鄆岑實踵成之是時栖筠已爲御史大夫矣布衣之
文俟貴顯而重與王播碧紗籠詩事正相類勢利之見豈獨縉
流爲然哉

贈工部尙書臧懷恪碑

大歷

右贈工部尙書臧懷恪碑不見立碑年月趙氏金石錄以爲大
歷中立顧氏金石文字記據碑文載廣德元年十月贈官詔書
因系之廣德元年予以魯公署銜證之而知德甫之可信也魯
公麻姑仙壇記云大歷三年真卿刺撫州其撰李含光碑云大
歷六年真卿罷刺臨川旋舟建鄴今此碑題金紫光祿大夫行
撫州刺史上柱國魯郡開國公則必在大歷三年以後矣寶刻
類編以爲開元十二年立則但據其卒之年月并未讀其全文
尤爲疏舛

潤州上元縣福興寺碑

大歷五年六月

右潤州上元縣福興寺碑首題尙書金部郎中潁川許口撰末
行亦殘缺惟歲在庚戌六月字可辨蓋代宗大歷五年也碑爲
張從申書而歐趙諸家初未著錄明顧起元金陵古今金石攷
始列于目其云尙書許某文則非也許君官金部郎中金部者
戶部四曹之一而統於尙書省故繫銜有尙書字唐人稱郎官
例稱郎中若員外郎則稱其官如金部屯田之類其稱尙書者
必是六部尙書未有以郎中而輒稱尙書者明人不通官制故
下筆多誤

贈太保張延賞碑

貞元三年十月

右贈太保張延賞碑首云貞元三年秋七月壬申丞相張公薨
于位又云冬十月乙酉蓋其葬之日趙氏金石錄題爲貞元三

年七月似未諦審其文矣文云太師又云歎異申以姻好謂苗晉卿以女妻之太師者晉卿贈官也後云祁國夫人太師其下剝落不可識祁國蓋延賞妻封号太師亦謂晉卿也前兩行曼滅不見換書人姓名趙德甫謂趙贊撰歸登書登善分隸有名於貞元元和間延賞子宏靖碑亦登所書見於寶刻類編今不可得矣

李抱真德政碑

貞元九年

右李抱真德政碑攷新舊唐書地理志五代職方攷磁州字無从心者此碑磁字點畫分明又天祐十一年澤州開元寺神鐘記亦作此磁字州縣之名當從其時本稱史臣秉筆任意更易非得石刻何由決其然否此金石之有益於史學未可以玩物喪志妄加訶斥也

聖母帖 貞元九年己月

右聖母帖不著撰書人姓名相傳以爲僧懷素書攷宣和書譜云懷素長沙人俗姓錢故自叙帖稱司勳員外郎吳興錢起爲從父此帖有從叔父淮南節度觀察使禮部尙書雖不書名以史證之則是杜岐公佑也錢與杜不同宗疑非藏真所書如果出於藏真則譌文必別自一人矣或以爲皇從叔父驗石刻無皇字

貞元無垢淨光塔銘 貞元十五年

右貞元無垢淨光塔銘今在福州府梁克家三山志云石塔寺在州西南貞元十五年德宗誕節觀察使柳冕以石造塔賜名貞元無垢淨光庾承宣爲記卽此碑也碑末題福建等州都團練觀察處置等使朝請大夫使持節福州諸軍事守福州刺史

史以下皆闕以三山志證之知所闕者爲兼御史中丞及柳冕姓名也次一行題監軍使朝議郎行內侍省內府局丞員外置同正員上柱國賜緋魚袋魚獻獻字剝落止存右一筆今據三山志補之志所書魚獻獻結銜字多譌脫又當據碑爲正耳碑中基趾字避諱作基與慈恩寺基公塔銘正同

追樹十八代祖晉司空河東太守猗氏侯王公碑

貞元

右追樹十八代祖晉司空河東太守猗氏侯王公碑予曩見於金陵袁子才齋係裝剪之本文義多不聯屬標題遼魯公書予心知其非而無從正也頃嚴子進拓得一紙貽予下截雖曼忠書碑人姓名猶可辨蓋韋縱也予向藏縱書鹽池靈慶公碑結體正相似鄭樵金石錄載縱書不及此碑蓋宋人見此刻者魁矣後題貞元十七年歲在辛巳十月庚寅朔二十日己酉建

較鹽池碑刻相去僅四年耳文爲號州刺史王頽所作其述幾
世云四十一代祖周平王孫赤其父泄未立而卒平王崩赤當
嗣爲叔父桓王廢而自立用赤爲大夫及莊王朝赤遂奔晉晉
用爲并州牧自赤至龜八代代牧并州龜生喬至文釗十六代
承前八代代襲封晉陽侯文釗生叔儻叔儻生伯口伯口生毛
毛生卓卽碑所稱晉司空也太原琅邪二譜皆祖王子晉見於
唐宰相世系表而顏皆非之今據史記周本紀平王崩太子洩
父洩與蚤死立其子林是爲桓王若赤爲平王孫則與桓昆弟
行不當云叔父矣春秋之世安得并州牧之稱晉書亦未見有
司空王卓其人者以矛刺盾亦未知孰得而孰失也碑稱右丞
維左相縉爲叔又議張說越認范陽封燕國公縉越認琅邪封
齊國公之失縉與顏相去不遠當得其實封氏聞見記載孔至

撰百家類例品第海內族望以燕公張說近代新門不入百家之數則燕公非名族當時固有議之者越認卽今人所謂通譜也

楊岐山禪師廣公碑

元和二年五月

右楊岐山禪師廣公碑廣公者乘廣也古人稱僧曰某公皆以名下一字故支道林曰林公佛圖澄曰澄公竺道生曰生公慧遠曰遠公寶誌曰誌公齊己曰己公宋元人稱僧或名字兼舉若洪覺範妙高峯柏子庭噩夢堂訢笑隱泐季潭之類亦取名下一字今世知之者尠矣此文載於劉賓客集以石刻校之不同者卅餘字皆當以石本爲正乘廣弟子甄叔亦有塔銘今集本叔作升誤之甚矣碑文之末有時宜春得良守齊口似是理行第一雅有護持之功化被於邑之庶黎及里之右族踴躍曰

向如邦君之志故偕異爵里名氏列于其陰凡五十字集木解之當是夢得編定文集時刪去之耳碑云始生之辰歲在丁巳當元宗之中元終之夕歲直戊寅當德宗之後元攷明皇三改元先天開元天寶則開元爲中元也德宗亦三改元建中興元貞元則貞元爲後元也夢得自署銜云朗州司馬員外置同正員蓋當時遷謫惡地不必待缺大率員外置之東坡詩云逐客不妨員外置正用唐故事

左拾遺竇叔向碑

元和三年十月

右左拾遺竇叔向碑朝議郎侍御史內供奉上護軍太山羊士諤撰第十一姪朝議郎尚書右司員外郎易直書易直兩字雖磨泐以筆勢求之仿佛可見趙氏金石錄以爲竇公直書公直名不見於宰相世系表疑未可據唐書竇羣傳武元衛輔政薦

羣代爲中丞羣引呂溫羊士諤爲御史李吉甫以二人躁險持
不下羣忤復反怨吉甫今按吉甫以元和三年九月戊戌罷相
碑立於是年十月癸丑士諤已爲侍御史計其授官必在吉甫
未罷之日則吉甫亦未能終持不下也文雖殘闕其所叙世系
頗可證唐表之漏據表叔向於善衡當爲曾祖而碑稱高祖善
衡又云曾祖元口兗州任城令然則表脫任城一格矣其所述
諸子官階與史不盡合史所載者後來歟歷之職此據當時見
任而言非有異同也

大悲心陀羅尼幢

寶歷二年二月

右大悲心陀羅尼幢在廣州府光孝寺末題同經畧副使將仕
郎前守辰州都督府監博士盧江邵何岩則敬爲亡兄節度隨
軍文林郎守康州司馬岩卿造法性寺住持大德兼蒲潤寺大

德僧欽造書欽造自題閩川人宅刻所未有也予家藏唐時石
幢甚多文皆右行此獨左行以今世所誦大悲咒核之無甚異
同唯夜作邪蘇作素盧作路穆作目育有輕重耳其後又有隨
羅尼一首石文剝落其名目不可攷矣

潛研堂金石文獻尾續卷第三

嘉定錢大昕

唐

甄叔大師塔銘

大和六年四月

右甄叔大師塔銘甄叔者乘廣之弟子也卒於元和庚寅正月
至大和壬子沙門至閑爲製塔銘相距二十有三歲矣題稱塔
銘而篆額作碑銘篆人爲琅邪王周古書碑人則僧元幽也此
碑向無著錄者餘姚邵二雲侍讀爲予言在萍鄉之楊岐山訪
之廿年不得頃澤州胥燕亭訪予吳門燕亭嘗宰萍鄉檢篋中
乘廣甄叔二碑相贈喜海內之有同好也因書數言識之

楊漢公題名

開成四年二月

右楊漢公題名在長興縣顧渚山之明月峽嘉慶辛酉春邢明
府佺山招予游是山始訪得之其文云湖州刺史楊漢公前試

太子通事舍人崔行章口事衙推馬悅州衙推唐從禮鄉貢進士鄭口鄉貢進士賈口開成四年二月十五日同游進士楊知本進士楊知範進士楊知口從行按唐書漢公傳但云除舒州刺史徙湖臺蘇三州刺史不言除授之年湖州府志題名云漢公開成三年三月自舒州移刺湖州充本道團練使此題云四年則莅任之次年也後列楊知本等三人從行當是漢公之子據本傳祇載子籌範二人宰相世系表漢公子有思愿輝籌範諱知章篆筠鑑簞管十一人未見有名知本者殆其子初名乎知範當卽範後去一字耳漢公兄虞卿之子有知退知權而漢公子亦有知章蓋楊氏羣從多以知聯名也

處士包公夫人墓誌

會昌三年十二月

右處士包公夫人墓誌海寧陳仲魚所贈云頃歲杭人培土得

之文字尙可辨有云行年六十有六以會昌三年十月九日奄
終錢唐縣方輿鄉之私第以其年癸亥十二月十二日丙申塋
于履泰鄉之南原攷咸淳臨安志錢唐縣十三鄉有履泰南鄉
履泰北鄉而未見方輿之名蓋宋時諸縣鄉里之名多有更易
不皆沿唐之舊也包君名字不見於誌今杭城南有包家山潛
氏臨安志已載之是包亦杭之舊族矣其書銘作詔則它碑所
未有

北嶽廟石柱題名

右北嶽廟石柱題名凡八面皆唐時祭嶽三獻官姓名向來金
石家皆未著錄庚戌九月予游曲陽於廟中搜得之亟命工摹
拓周遭讀之得文四通其一大中二年二月十三日節度使韋
振爲初獻其一大中二年十二月廿一日其一大中六年九月

十六日皆節度使李公度初獻其一咸通六年二月廿九日則
觀察使韋絢初獻也損公度結銜皆云義武軍節度易定等州
觀察處置北平軍等使獨絢稱易定等州觀察處置等使無節
度及北平軍使之稱未詳其故咸通終獻官節度掌書記試秘
書省校書郎柳告字口益蓋子厚之孫咸通四年以第三人登
科者也下方有元祐戊辰吳興劉燾無言題字云徧讀題刻唐
人書類有楷法而二石柱尤佳是廟中石柱有二予惟見其一
耳

銅磬經咒文

大中五年九月

右銅磬經咒文前爲般若波羅蜜多心經十五行次佛頂尊勝
總持經咒八十一行最後兩行刻皇圖鞏固帝道遐昌佛日增
輝法輪常轉四句小楷端勁似魯公麻姑壇記磬口隸書皇唐

大中五年九月九日造頃江寧張君復純拓其文見貽且云此
磐向在天台國清寺桐鄉汪某以腴田卅畝從寺僧易得之今
爲鎮洋畢尙書所有以今工部尺度之崇尺有五寸十分寸之
八口徑七寸十分寸之三經咒文於腹內周刻之

盧鄴幼女姚婆墓誌

大中七年七月

右盧鄴幼女姚婆墓誌禮十六至十九爲長殤十二至十五爲
中殤八歲至十一爲下殤七歲已下爲無服之殤下殤女子於
法可以無誌然韓退之爲女挈銘壙世莫以爲非者父之子子
不忍其遽湮沒而欲有所托以永其傳亦人之恒情乎噫自唐
以來達官貴人豐碑大書不久而湮沒者何限而姚婆一弱女
越千載後乃得傳姓名於士夫之口事之有幸有不幸若此者
可勝道哉

尊勝陀羅尼真言并讚

大中甲戌秋八月

右尊勝陀羅尼真言并讚在元和縣甫里保聖寺吾友嚴豹人訪得搨以詒予末題大唐大中甲戌歲秋八月元日建進士崔渙字穎枝書并撰讚刻有正書三行則宋皇祐五年住持沙門惟吉等重立題記也此幢不見於志乘而崔君書法精勁可觀其名右旁稍泐豹人疑是璞字今諦審之當爲渙非璞矣譯音初無定字予見石刻南無字或作南牟或作擬謨或作那謨或作納謨此又作納菓音皆相近

郎官題名石柱

大中十一年

右郎官題名石柱八面如幢式自左司龍騰部皆先郎中次員外郎姓名俱正書按唐宋之制六部皆隸尚書省吏戶禮居左兵刑工居右其叙遷則以吏兵爲前行戶刑爲中行禮工爲後

行每部各領四司司名與部同者爲頭司餘爲子司二十四司之外別有左右司各置郎中員外郎皆稱郎官此柱所刻則左司及左十二曹也歐趙所載張長史書石柱記有文無題名蓋別是一碑久已不存此柱雖有殘闕亦僅十之一二合之御史臺題名一代清流姓名畧備未必非攷史之一助也

窳堵波塔銘

咸通五年八月

右窳堵波塔銘布衣高埔述并書案釋元應一切經音義云寶塔諸經論中或作藏斗波或作塔婆或云兜婆或言偷婆或言蘇偷婆或言脂帝浮都亦言或提浮圖皆譌畧也正言窳覩波此譯云廟或云方墳此義翻也案元應以窳覩波爲正此又作堵譯音元無定字也窳堵波與塔卽非二物此題云窳堵波塔重複無當蓋唐人不知梵義者爲之耳予嘗謂古無塔字唯葛

洪字苑有之云佛堂也者宅合反見一切經音義据元應所述諸文斗也兜也帝也觀也皆與荅聲相近釋教初入中國塔婆字本宮爲荅後人增加土旁而雅川承之其音爲他合切者又卽偷婆之轉聲也

後魏昌黎王馮熙新廟碑 咸通八年十一月

右後魏昌黎王馮熙新廟碑蓋其十二代孫元德所述而弟元錫書之者大畧云廟爲洛北之望祀遠近里社鼓管趨赴及問王之名位爵邑皆失其傳碑板埋滅莫識何從退尋家牒攷於魏史知卽愚之十二代祖則是神之名字本無可攷特出於元德輩之傳會耳熙以外戚貴盛本無才能其在洛取人子女爲奴婢有容色者幸之爲妾號爲貪縱營塔寺多在高山秀阜傷殺人牛有沙門勸止之熙曰成就後人唯見佛斷焉知殺人牛

也此其爲政豈有功德及人而能廟食百世者馮君之名不傳
後代要當疑而闕之若執此誣妄之詞以爲左證非勸善之義
矣碑末題十一月壬子九日甲辰尤爲舛謬若壬子爲月朔日
則九日是庚申非甲辰若甲辰是月之九日則朔日當是丙申
且壬子在甲辰之後不應倒置若此攷溫公通鑑目錄推是歲
十一月果是丙申朔可據以正碑之誤

某君墓誌

咸通十一年二月

右某君墓誌蕭山汪煥曾所詒云縣人掘土新得文字尙可讀
惜前數行斷裂無從得其姓名據銘詞云嗚呼公都碩學鴻儒
豈公都卽其字邪君以咸通十年四月歿十一年二月葬製文
者名庠姓亦無可攷文云葬于昭元鄉昭元里社頭村之原而
空處別有一行云續改地在廣孝鄉延壽里杜湖村之原此式

它碑未之有言金石例者所當知也

瑯琊王夫人墓誌

乾符三年二月

右瑯琊王夫人墓銘在西安府崇仁寺題云墓銘實與佛頂尊勝陀羅尼同刻一幢非埋于窆中者瑯琊字古書多作琅邪此用唐人俗體夫人爲玉冊官內供奉強瓊之妻強氏見於史者唯宋強至及其子淵明瓊仕玉冊官殆以鐫字供奉者歟文云忽染膏荒之疾借荒爲旨也

尊勝陀羅尼經

乾符五年

右尊勝陀羅尼經乾隆壬子十月張夔子恂訪予吳門寓館出此幢拓本見詒云在昭文縣梅李鎮之燕脂墩邑乘向未采錄頃始訪求得之蓋唐乾符五年所鐫距今九百一十四年矣唐石幢多不列書人姓名此幢亦然玩其筆跡道整有法度不在

高岑僧无可之下

撫州寶應寺鐘文

大順元年十月

右撫州寶應寺鐘文云維唐大順元年歲次庚戌拾月癸未朔拾壹日癸巳撫州寶應寺募衆緣於洪州南冶鑄銅鐘壹口重三阡斤上爲國王大臣當府司空郡主尙書次及州縣官遼將士軍人什方信男信女師僧父母然願國界安寧法輪常轉有識含靈同霑此福永充供養其云當府司空者鎮南軍節度使鍾傳也郡主尙書者撫州刺史危全諷也列名者百餘人首一行云金紫光祿大夫檢校工部尙書使持節撫州諸軍事守撫州刺史兼御史大夫上柱國危全諷攷全諷以中和二年壬寅歲據撫州至梁開平三年己巳爲楊氏所併在州二十八年唐五代二史僅附見鍾傳傳其檢校工部尙書亦可裨二史之闕

升僊廟與功記

義寧四年正月

右升僊廟與功記尙書禮部郎中賜緋魚袋李綽撰末行前進士鄭珏書其下有述云光化三年添前字顧氏日知錄云唐人未第稱進士已及第則稱前進士雍錄引唐人詩云曾題名處添前字今讀此碑足爲添字之證顧氏曾游嵩少惜其未睹此刻也李綽有秦中歲時記一卷陳直齋題爲唐膳部郎中其序云緬思庚子之歲洊周戊辰之年戊辰梁開平二年也按唐時六部各分四曹禮祠客膳雖云同署而禮部爲顧司祠部主客膳部爲子司資望不等綽於乾寧四年已官禮部郎中更閱十有餘歲何以轉題膳部恐直齋誤記抑或中遭罷斥而更叙復乎

梁府君墓誌

天祐十年孟冬月

右梁府君墓誌文云以天祐十年癸酉歲孟冬月己巳朔二十三日辛卯於易州東北隅一里半易縣口山鄉梁村之右蓋在唐亡之後七年易定節度使王處直猶用唐年號也攷後梁以天祐四年丁卯受唐禪處直奉其正朔至開平四年庚午與鎮州王鐸俱附於晉復用唐年號當稱天祐七年則癸酉歲正天祐之十年也誌載曾祖諱希幹皇祖諱南平皇考諱重立字顯英述其事狀甚備其後云夫人武功蘇氏云云又云府君有嗣子三人而於府君之名字行狀絕不及焉細釋之則皇考與府君竟是一人而誌文又非其子所作所謂名不正而言不順者矣

澤州開元寺神鍾記

天祐十一年七月

右澤州開元寺神鍾記首云昭義軍節度使澤潞磁邢洛等州

觀察處置等使開府儀同三司檢校太傅兼侍中潞州大都督
府長史上柱國隴西郡開國公食邑一千五百戶李嗣昭新修
澤州開元寺神鍾記末題天祐十一年七月十三日蓋唐莊宗
繼鎮河東仍用天祐紀年於梁爲乾化四年也唐時昭義節鎮
本領五州季年汴晉交兵澤潞屬晉邢洺磁屬梁此鍾晉人所
刻邢洺磁三州久不在昭義管內而結銜猶仍唐舊史載五州
次第皆列磁於邢洺下此獨移磁在邢上然則方鎮下支郡初
無一定之次矣此銘鑄於鐘上字畫亦秀整不失唐人規矩宋
以後鐘款多隱起作陽文非古製也歐史載嗣昭歷官甚畧其
檢校太傅兼侍中隴西郡公皆例所應書而史失之唐制方鎮
加中書令侍中平章事者謂之使相記文稱嗣昭爲府主侍中
蓋舉其重者稱之三師三公秩雖正一品尙不如使相之榮也

張孝孫題名

右張孝孫題名在左據題名之後其文自左而右云銀青光祿
大夫殿中下闕將軍左金吾衛大將軍下闕節度副使元從鎮
國下闕潼關節度都虞候下闕張孝孫恭謁靈祠凡五行不署
年月攷唐自明皇幸蜀肅宗卽位德宗幸奉天而從行將士始
有元從之名方鎮表典元元年以華州置潼關節度使貞元九
年罷潼關節度使此後別無潼關節度之稱又舊唐書李元諒
傳遷華州刺史兼御史大夫潼關防禦鎮國軍節度使是鎮國
卽潼關節度之軍號孝孫名雖不見於史以題銜證之當是興
元貞元時人也末行下有熙寧辛亥云云乃宋人續題字體大
小迥殊或疑孝孫卽熙寧間人第弗確攷尔

賁瑩等題名

石竇等題名七行在青州府城門壁間李南潤郡丞揭以見
贈其文左行上下俱殘闕每行厯存十數字曰州觀察處置押
新羅渤海兩蕃等使金紫曰事兼青州刺史御史大夫上柱國
韓國曰部員外郎兼侍御史內供奉賜緋魚袋竇曰裏行韋
曾曰上柱國齊孝宏曰儀郎薛華士曰裏行源方同案唐制節
度使例兼管內觀察處置等使及本州刺史淄青節度又例兼
押新羅渤海兩蕃使此首兩行蓋淄青節度之銜韓國似其人
封爵也舊唐書竇瑒傳云平盧薛平辟爲副使入朝拜侍御史
平盧卽淄青軍號此題蓋在瑒任節度副使之日則首兩行殆
卽薛平之銜乎舊唐書憲宗紀元和十四年三月以義成軍節
度使薛平爲青州刺史充平盧軍節度淄青齊登萊等州觀察
等使此題名必在元和末矣

後梁

昭義軍節度葛從周碑

貞明二年十月

右昭義軍節度澤潞等州觀察處置等使開府儀同三司檢校太師兼侍中守潞州大都督府長史葛從周神道碑貞明二年十月建從周歐史有傳其檢校太師兼侍中則史未之載昭義者潞州軍號也唐李潞爲河東所有不在朱梁管內從周以疾致仕遙授節度令食其俸于家非眞節度也宋世節鎮在家支俸之例實助于此周德威小字陽五此碑作揚五文云歸葬于偃師縣毫邑鄉黃叔瓚中州金石表所載偃師碑甚夥而獨遺此吾友武君虛谷始揭以遺予文雖殘損猶足爲攷史之助于思容齊乘謂在平縣有五代葛從周墓土人名曰葛塊讀是碑始知士俗相傳之誤

後晉

贈太傅羅周敬墓誌

天福二年十月

右贈太傅羅周敬墓誌近洛陽人瘞土得之吾友僊師武虛谷始著於錄昨常熟張子恂游中州寄僕石刻四通此其一也周敬者梁天雄軍節度使中書令紹威第三子義成軍節度使周翰之弟歐史雖附見紹威傳而事迹不詳此誌文尙完好所述除授官職月日具備可裨史家之闕其母秦國夫人劉氏故兗州節度使太師公之女當是劉鄩也周敬以世胄尙梁公主十歲卽鎮滑州十二移鎮許州入唐及晉歷掌環衛唯唐明宗時曾一出鎮同州年才卅三身歷三代殷鵬作誌唯書晉天福年號前代但紀于支頗爲有法而中有梁乾化初一語則又自亂其例矣誌文云葬于洛陽縣之原而銘詞後有洛陽縣清封鄉

積岡村九字宅碑未見此例也側儼不郡郡當作羣壁田東墓
壁當作璧此下筆偶誤或偏旁同者可假借互用乎

後周

濟州刺史任公屏盜碑 顯德二年閏九月

右濟州刺史任公屏盜碑在鉅野縣人墮水中姚半塘始募人
昇出捐一紙貽予文甚完好金石家都未著錄也題云大周推
誠奉義翊戴功臣特進檢校太保使持節濟州諸軍事行濟州
刺史兼御史大夫上柱國西河郡開國公食邑二千三百戶任
公屏盜碑銘并序朝議郎行左拾遺充集賢殿修撰臣李昉奉
勅撰翰林待詔朝議大夫行司農丞臣張光振奉勅書碑末題
軍事判官朝議郎行大理司直兼殿中侍御史張穆篆額以非
奉勅篆故不稱臣而退居後也任公名漢權蜀國人以武略事

累朝初牧於丹移治於趙後乃治濟以武夫而有政績良未易得而新舊五代史不見其姓名經八百餘年此碑復顯於世斯亦能吏之報矣予初見郭進衛州屏盜碑證以史傳歎登洛二州之碑不可復得今觀此碑乃知當時諸州立石頌德者不止進一人而光振書法道州亦不在孫崇望下也

匡國軍節度使贈太尉白延遇碑

顯德六年七月

右匡國軍節度使贈太尉白延遇碑置塋中洊於園妙觀市買得之碑凡卅七行行七十五字首題大周故推誠奉義翊戴功臣匡國軍節度管內觀察處置等使光祿大夫檢校太傅使持節同州諸軍事行同州刺史兼御史大夫上柱國南陽郡開國公食邑二千戶贈太尉白公神道碑銘將仕郎守右拾遺臣楊徽之奉勅撰翰林待詔將仕郎試秘書省校書郎何光翰書公

諱延遇字希望太原人事晉祖補弓箭庫使歷挂密都虞候興
口都指揮使鄴都口步軍都指揮使以功超轉口口第六軍都
指揮使領萬州刺史又轉第二軍都指揮使綿州刺史漢興以
平鄴功授護聖左廂都指揮使檢校司徒領口州防禦使少主
嗣位授汾州防禦使罷任授復州防禦使加檢校太保太祖討
兗州充馬步軍先鋒兗州平授齊州防禦使加檢校太傅皇上
臨御授兗州防禦使進封開國公南征之始以公充淮南道前
軍先鋒都指揮使四年春奉詔歸任未幾授匡國軍節度使加
食邑至二千戶是年秋復充淮南道前軍先鋒都指揮使兼招
安巡檢使統兵濠州冬十月靈旗載舉公已寢疾以十一月四
日薨于濠州師次享年四十三詔贈太尉賙賻有加門人故吏
護喪歸東京至五年正月二十七日巳酉葬于西京河南縣口

□鄉張封村西張里按延遇以軍功擢節鎮未到官而卒史不爲立傳故撮其歷官本末以裨史氏之闕皇甫暉之就擒史但歸功于宋太祖而此碑云皇甫暉口口滁州懷謀堅壁默猶因闔孤但首丘卒衆先登生擒以獻朝廷嘉賞功實居先碑爲微之奉勅撰述當必不誤微之仕周官右拾遺與宋史本傳合碑云葬于西京河南縣而畢氏中州金石記未著于錄不識碑石今無恙否也

尊勝陀羅尼幢

右尊勝陀羅尼幢在廣德州城北廿里鎮山寺甲寅歲瞿堦鏡壽游桐川手拓其文歸以牒予文稱將仕郎守尉金峻將仕郎守尉孔擢將仕郎守尉殷湘文林郎守主簿周拭攝丞文林郎守文學孔詒鎮過使兼監察御史下閩又稱募衆緣造佛頂尊勝

陀羅尼幢一隻於安國寺殿前豎立奉爲國王帝主州縣衆
及諸助緣弟子四恩三友法界有情同霑下目字畫有唐人法
度而不見年月按鎮遏使唐季五代往往有之此幢疑楊氏承
制時所刻陸子靜跋信州雄石鎮帖桐官名有鎮遏使唐龍紀
元年刻

吳

尊勝陀羅尼眞言

天祐二年閏十一月

右尊勝陀羅尼眞言後題右街右南巡贊賢坊市北界清信男
弟子周從今捨淨財建造佛頂尊勝陀羅尼碑子一所捨於井
畔永充供養意者爲亡妻丁氏二娘子於天祐二年四月丙辰
患時疾之時不知誤落井中爲伏卽復固意投井致於身死從
緣此時亦在床枕昏迷不知端的自從歿化已來未知生界伏

彫即願字

現不昧承此功德早生淨土見佛聞法莫似今生愛

別離苦云云時天祚二年歲次丙申閏十一月庚子朔一日口
口建天祚者楊溥年號其二年即晉天福元年也據溫公通鑑
目錄是歲十月丙辰朔十二月乙酉朔閏在十月此碑云閏十
一月蓋當時南北分土司天置閏先後或差一月固無足怪但
依溫公所推則閏十月當丙戌朔十一月當丙辰朔江南置閏
即在十一月後其朔亦當是乙卯丙辰兩日不應差至半月餘
石刻作庚子未可據也

吳越

竹林寺石幢

右竹林寺雙石幢在臨安縣東西相向制極雄偉皆吳越錢武
肅王所立東幢刻佛說守護國界主陀羅尼經西幢刻千手千

眼大悲心陀羅尼經後有跋語數行皆龍語末題寶大元年歲次甲申五月一日天下都元帥吳越國王鏐建則兩幢皆同其云七帝酬恩者謂唐懿宗僖宗昭宗哀帝梁太祖末帝後唐莊宗也甲申者後唐同光二年王順伯復齋碑錄搜錄吳越紀元石幢甚多而此兩幢獨未之及王象之輿地碑目亦遺之頃歲何夢華始訪得椎拓其文頗完好可誦予因與寓目焉亦晚年一快也風山碑寶正字頗磨泐而此幢寶大字未經幾損吳任臣十國春秋於建塔修廟皆大書於世家此幢獨不著錄今距吳氏著書又百餘年而予乃得見之斯亦足以傲前賢矣

新建風山靈德王廟記

寶正六年

右新建風山靈德王廟記後題寶正六年重光甲辰歲爲相之月二十有三日記最後一行題天下都元帥吳越國王九字字

較大而不署名讀其文自稱寡人知爲武肅王所撰字體與崇福侯廟碑相似殆出一手寶正兩字磨泐不甚可辨蓋忠懿納土後銳去尔雅釋天云七月爲相此題爲相之月必七月矣吳氏十國春秋載寶正六年冬十一月重建防風山靈德王廟成王勅撰廟記卽謂此碑但記文明言丙戌年八月二十四日起首至其年十一月畢功丙戌者寶正元年以八月興工十一月告成洎辛卯歲立碑相距已五載吳氏誤以立碑之年爲廟成之年又誤以相月爲十一月皆攷之未審爾史記汪罔氏之君守封禺之山裴駰引韋昭曰封封山禺禺山在吳安縣又云駟案晉太康元年改永安爲武康縣今屬吳興郡今風山在縣東二十里廟在山下風封同音殆卽韋君所謂封山也予收藏金石刻二千餘通吳越刻亦有十餘獨未得天寶寶大寶正

之刻常以爲憾丙辰春錢唐何夢華購此寄贈令我手解輕欲旋矣

僧統大師塔銘 應順元年五月

右僧統大師塔銘在臨安縣功臣山淨度寺向來金石家皆未著錄頃錢唐何夢華訪得手拓一通見詒文二十四行行六十四字首題吳越國故僧統慧因普光大師塔銘而篆額但云吳越國故僧統大師塔銘蓋以統攝爲貴不以美號爲榮緇流之尙勢利與仕途如一轍也文云大師俗姓錢氏法號令因卽今天下都元帥吳越國王第十九子歿十國春秋載武肅王三十八子不言有出家者是吳氏未見此碑矣師年始十三於梁乾化三年四月對佛披剃寶大元年八月十三日圓寂享年二十有四卽以其年十二月歸窆撰文者鎮東軍節度掌書記徐其

名則不可辨矣書人名益剗初似有沙門字未行云時唐應順元年歲次甲午五月庚子朔十九日戊午建應順者唐閔帝紀年也是歲四月潞王篡立改元清泰此碑建於五月猶書應順者洛都與吳越隔遠又爲淮南所阻使命皆由海道得達潞王改元之詔吳越無由知之也碑文用梁乾化貞明龍德年號而特書寶大紀年不用唐同光之號此不可解

吳越國王造塔記

乙卯歲

右吳越國王造塔記凡四行文云吳越國王錢弘俶敬造八万四千寶塔乙卯歲記卽周晉仙所謂金塗塔也晉仙詩云錢王納土歸京師流落多在西湖寺納土本忠懿王事惟詩中太師尙父尙書令一語偶誤蓋忠懿未曾有尙父之稱也竹垞檢討直以爲武肅王造由於未見拓本故不宋史吳越世家忠懿

名倣基避宋諱去上二字塔造於乙卯歲在宋受禪之前固無所避也

崇化寺西塔基記

戊午七月

右崇化寺西塔基記文云吳越王長舅鄭國公吳延福載興瑯塔二所香泥木石爲此銀基厚二丈餘其固若山他日製爲請無疑也按宋史吳越世家建隆元年倣舅寧國軍節度使吳延福有異圖左右勸倣誅之倣曰先夫人同氣安忍寘於法但黜延福於外終全母族史不言鄭國公之封畧之也後題唐下元戊午七月二十八日戊午爲周世宗顯德五年乃稱唐下元者遜甲三元術以唐興元元年甲子爲上元會昌四年甲子爲中元天祐元年甲子爲下元戊午乃下元甲子之第五十五年溯其始而言故云唐下元也虎印石幢題下元甲子顯德五載龍

集戊午雖以顯德繫年仍冠以下元甲子亦同此例且當時方鎮割據世守其土雖奉中朝正朔不肯加大周大宋之稱如祇園寺塔稱顯德而不稱大周南唐龍光寺碑稱開寶而不稱大宋皆其證矣

祇園寺舍利塔題字

顯德五年十一月

右祇園寺銅舍利塔題字海鹽張燕昌芑堂嘗爲予言在蕭山之祇園寺乾隆丙申殿前方浮圖爲水所圯寺僧拾壤輒得小方塔一高七寸博五寸其製似錢忠懿王金塗塔芑堂嘗與邑人汪進士輝祖煥曾蔡秀才英雲白同往觀之癸卯歲予過蕭山人入祇園寺訪僧維詭言在縣令所悵然而返丙辰秋煥曾始揭其文貽予凡五十九字周圍刻之云弟子夏承厚并妻林一娘闍家眷屬捨淨財鑄真身舍利塔兩所恐有多生罪障業障

竝願消除承茲靈善願往西方淨土戊午顯德五年十一月三日記蓋吳越忠懿王嗣位之十一年奉中朝正朔也蔡君記作夏承原今審視之當是厚字

南漢

拓路記

大寶三年

右拓路記其文云以大寶三年庚申歲月在仲冬開拓此路爲留題記凡三行二十字行書頗縱逸在潮州府西湖有大石上金石家未有著錄者益都李南淵知潮陽日赴郡游斯湖始見而拓之

後蜀

石經左傳殘字

子也

夫子

君子有信其有以知之矣

爲

年齊樂施高自齊聘於衛衛侯享之北

宮文子賦淇澳淇澳詩衛風美武公宣子

賦木瓜木瓜亦衛風義取夏四月韓須如

齊送女齊陳無字送女致少姜少

姜有寵於晉侯晉侯謂之少齊為立別號所

謂陳無宇非卿欲使齊以適夫執諸中都

中都晉邑在山西少姜為之請曰送從逆班

也班列畏大國也猶有所易是以亂作韓

公族大夫陳無宇上大夫言齊畏晉改易禮制

叔弓聘于晉報宣子也此春晉宣晉侯

使郊勞聘禮賓至近郊辭曰寡君使已

來繼舊好固曰女無敢為實微命於

執事敝邑弘矣也敢辱郊使請辭

辭勞致館辭曰寡君命下臣來繼舊

好好台使成臣之祿也得通君命則敢辱

大館敢不叔向曰子叔子知禮哉吾聞

中間闕一行脫正文十四字注二字

也辭不忘國忠信也謂稱先國後已卑

讓也始稱敝邑之弘先國也詩曰敬愼威儀

以近有德夫子近德矣詩大秋鄭公孫

黑將作亂欲去游氏而代其位游氏大族

游楚所傷故傷疾作而不果前年游楚駟

氏與諸大夫欲殺之明氏黑子產在鄆

聞之懼弗及乘遠而至遠傳使吏數

之責數曰伯有之亂在襄三以大國之事

按伯有死在襄三
十年注衍一字

而未爾討也不暇治女罪爾有亂心無

厭國不女堪專伐伯有而罪一也昆

弟爭室而罪二也謂爭徐吾
犯之妹薰隧之盟

女矯君位而罪三也謂使大史
書七子有死罪

三何以堪之不速死大刑將至再拜

稽首辭曰死在朝夕無助天為虐子

產曰人誰不死凶人不終命也作凶事

為凶人不助天其助凶人乎請以印為

稽師印于晉之子
稽師市官子產曰印也若才君將

任之不才將朝夕從女女罪之不恤而

古春秋左傳殘本三百九十五字注二百六十七字吳門陳芳

林所藏皆昭二年傳左氏之第二十卷也曾宏父石刻鋪叙云
春秋左氏傳二十八冊三十卷序一千六百一十七字經傳十
九萬七千二百六十五字注十四萬六千九百六十二字蜀鐫
至十七卷止此殘字在十八卷以後或疑宋人續刻今攷成都
志但云公穀田況所刻不及左傳此殘字中遇宋諱初不缺筆
其出于孟蜀無可疑者宏父雖云春秋三傳則皇祐元年九月
訖功而兼采成都志之言則固不以左氏傳爲泥刻也詩書禮
記周禮皆有書人姓名而無刊石年月儀禮則并無書人姓名
與左傳同大約諸經書石本同一時而卷帙有多寡故鐫成有
先後之殊工成或在宋代字畫質皆蜀刻左傳於諸經中文字
最繁鐫成亦最在後非蜀亡之日尙有未經繕寫者留待宋人
續補也唯公穀二傳廣政中未有寫本旋遇國亡此事遂輟直

至皇祐初田況作郡始續成之耳攷蜀之亡在乾德三年乙丑
距皇祐元年己丑八十有四年使左傳果刻至十七卷止僅存
後十三卷何至遷延八十餘載始告成事耶南宋時蜀石經完
好無恙曾宏父趙希弁輩述之甚詳而元明儒者絕無一言及
之殆亡於嘉熙淳祐以後近錢塘厲太鴻曾見毛詩左傳殘字
作詩紀之予訪求四十年不可得蓋流落人間者希矣